

BEB/hbr/gfm

BASES REGULADORAS E CONVOCATORIA PARA PARTICIPAR NO CONCURSO DE DESEÑO DO CARTEL QUE SERÁ A IMAXE DO I ENCONTRO LITERARIO E ARTÍSTICO “PONTEVEDRA LITERARIA. XUVENTUDE E ARTES”

A Deputación de Pontevedra, a través do Servizo de Xuventude e Reto Demográfico, convoca anualmente os Premios Provinciais á Xuventude, coa finalidade de promover o talento e esforzo da mocidade, estimular a súa creatividade e recoñecer o seu compromiso coa cultura, as artes, as ciencias e a investigación, entre outros.

Nas últimas edicións dos devanditos premios observouse un aumento no número de solicitudes en todas as categorías, pero especialmente nas de “traballo literario breve” e “fotografía orixinal”, o que denota un especial interese polas iniciativas de creación literaria e artística.

Por iso, a Deputación de Pontevedra organiza o próximo mes de outubro un encontro literario e artístico destinado á mocidade, co título “Pontevedra Literaria. Xuventude e Artes”. Este evento consistirá nunha serie de charlas-coloquio, impartidas tanto por novelistas cunha traxectoria consolidada como por algunhas das persoas galardoadas en anteriores edicións dos devanditos premios. Nestas xornadas compartirán as motivacións que as animaron a escribir, relatarán as súas experiencias no mundo literario e darán consellos e recomendacións para as persoas que se queiran iniciar nesta disciplina.

Ademais, o encontro completarase con dúas exposicións: unha de fotografía, na que se amosarán as obras gañadoras das últimas sete edicións dos Premios Provinciais á Xuventude, e outra de pintura, que incluírá cadros realizados por mozas e mozos da provincia.

Con ese propósito, convócase a través destes bases o concurso para o deseño do cartel que será a imaxe do I Encontro Literario e Artístico “Pontevedra Literaria. Xuventude e Artes”.

A convocatoria deste concurso supón o exercicio por parte da Deputación de Pontevedra dunha actividade de promoción sociocultural da mocidade a través da cooperación no fomento do desenvolvemento económico e social e na planificación no territorio provincial, de acordo co previsto no artigo 36.1.d da Lei 7/1985, de 2 de abril, reguladora das bases do réxime local (LRBRL).

Nesta liña, no artigo 109.d da Lei 5/1997, de 22 de xullo, de Administración local de Galicia, establécese que serán competencias propias das deputacións provinciais as que baixo este concepto se lles atribúan nas leis e, en calquera caso, entre outras, o fomento e a administración dos intereses peculiares da provincia. Do mesmo xeito, no artigo 118.d desta mesma lei dispónse que é competencia das deputacións provinciais a organización de concursos e exposicións e de calquera outra actividade cuxa finalidade sexa o fomento da cultura. Neste senso, ponse en marcha esta iniciativa co fin de promover a participación da xuventude da provincia de Pontevedra.

Por todo o exposto, e ao abeiro do establecido na Lei 38/2003, de 17 de novembro, xeral de subvencións (LXS), na Lei 39/2015, de 1 de outubro, do procedemento administrativo común das administracións públicas (LPACAP), na Ordenanza reguladora de subvencións da Deputación de Pontevedra e na demais normativa aplicable, convócase este concurso, de acordo coas seguintes

BASES REGULADORAS

Primeira. Obxecto

Constitúe o obxecto destas bases aprobar e regular a convocatoria pola que se rexen as solicitudes de participación no Concurso de deseño do cartel que será a imaxe do I Encontro Literario e Artístico "Pontevedra Literaria. Xuventude e Artes".

A participación nesta convocatoria efectuarase en réxime de concorrencia competitiva, de acordo cos principios de publicidade, transparencia, obxectividade, igualdade e non discriminación, así como os de eficacia no cumprimento dos obxectivos fixados e de eficiencia na asignación e no uso dos recursos públicos.

Segunda. Persoas beneficiarias

A convocatoria está dirixida a mozas e mozos de idades comprendidas entre os 16 e os 35 anos e empadroados nun concello da provincia de Pontevedra.

As persoas solicitantes deben estar ao corrente das súas obrigas coa Axencia Estatal de Administración Tributaria (AEAT), coa Axencia Tributaria de Galicia (ATRIGA), coa Seguridade Social e coa Deputación de Pontevedra no prazo de presentación de solicitudes.

Terceira. Premios

O traballo gañador será premiado con trescentos (300,00) euros, con cargo á aplicación orzamentaria 24/233.2310.481.01 do Orzamento provincial.

Cuarta. Lugar de presentación de solicitudes

4.1. As persoas interesadas en participar deberán presentar a súa solicitude, preferiblemente por medios electrónicos, a través do formulario normalizado dispoñible na Sede electrónica da Deputación de Pontevedra (<https://sede.depo.gal>).

4.2. Para a presentación das solicitudes, a Sede electrónica da institución provincial admite os certificados electrónicos do sistema Cl@ve, que contempla a utilización de sistemas de identificación baseados en claves concertadas (sistemas de usuario e contrasinal) e certificados electrónicos (incluído o DNle).

Opcionalmente, as solicitudes poderán presentarse presencialmente en calquera dos lugares e dos rexistros establecidos na normativa reguladora do procedemento administrativo común mediante o formulario normalizado dispoñible na Sede electrónica da Deputación de Pontevedra. Unha vez cuberto, xerarase a solicitude en formato PDF, que se deberá imprimir e asinar para a súa presentación presencial, excepto as persoas participantes que teñan a obriga de relacionarse coas administracións públicas por medios electrónicos, as cales deberán empregar unicamente ese medio, tal e como se dispón no artigo 14.2 da LPACAP.

4.3. Só se permite a presentación dunha solicitude por persoa. A presentación da solicitude de participación supón a aceptación incondicional destas bases.

Quinta. Prazo de presentación de solicitudes

O prazo de presentación das solicitudes e da documentación complementaria comezará o día seguinte ao da publicación desta convocatoria na Base de Datos Nacional de Subvencións (BDNS) e do seu extracto no *Boletín Oficial da Provincia de Pontevedra* (BOPPO), e rematará o **30 de agosto de 2024**.

Sexta. Características dos proxectos e documentación que se debe presentar

6.1. Os proxectos propostos consistirán nun cartel representativo do encontro literario e artístico, destinado á mocidade, baixo o lema “Pontevedra Literaria. Xuventude e Artes”. Neste realizaranse charlas-coloquio impartidas por novelistas, nas que compartirán as súas motivacións para animarse a escribir, relatarán as súas experiencias no mundo literario e darán consellos e recomendacións para as persoas que se queiran iniciar na escrita. Ademais, completarase con dúas exposicións: unha de fotografía, na que se amosarán as obras gañadoras das últimas sete edicións dos Premios Provinciais á Xuventude, e outra de pintura, que incluírá cadros realizados por mozas e mozos da provincia

6.2. Os proxectos presentados deberán ser orixinais; entenderase por traballo ou proxecto orixinal aquel que non fose copiado, reproducido nin imitado, en todo ou en parte, doutro anterior. Non se poderán presentar deseños que xa participasen total ou parcialmente noutros certames ou concursos de similares características; neste suposto, quedarán automaticamente excluídos.

6.3. O deseño deberá presentarse en tamaño A3 (29,7 cm x 42 cm) en formato PDF ou JPG.

6.4. As persoas interesadas eximen a institución provincial de toda responsabilidade derivada do plaxio ou de calquera outro incumprimento ou infracción da lexislación vixente en materia de propiedade intelectual na que puidesen incurrir.

Sétima. Comprobación de datos

7.1. Para a tramitación deste procedemento consultarase automaticamente os datos incluídos nos seguintes documentos elaborados polas administracións públicas:

- NIF das persoas físicas solicitantes.
- NIF das persoas representantes, no seu caso.
- Certificado de residencia das persoas físicas solicitantes.
- Certificación de que as persoas participantes estean ao corrente das súas obrigas coa AEAT, coa ATRIGA, coa Seguridade Social e coa Deputación de Pontevedra.

7.2. Se as persoas interesadas se opuxesen ás devanditas consultas, deberán indicalo no cadro habilitado no formulario de inicio e achegar os documentos correspondentes.

7.3 Excepcionalmente, en caso de que algunha circunstancia imposibilitase obter estes datos, poderáselles solicitar ás persoas interesadas que presenten os documentos correspondentes.

Oitava. Trámites administrativos posteriores á presentación de solicitudes e emenda destas

8.1. Todos os trámites administrativos que as persoas interesadas deban realizar durante a tramitación deste procedemento faranse preferentemente por medios electrónicos a través do modelo "2887054 Trámites administrativos xenéricos distintos da solicitude", dispoñible en <https://sede.depo.gal>.

Opcionalmente, tamén se poderán tramitar presencialmente en calquera dos lugares e dos rexistros establecidos na normativa reguladora do procedemento administrativo común, agás nos supostos do artigo 14.3 da LPACAP.

8.2. A Sede electrónica ten dispoñibles unha serie de modelos xenéricos que as persoas interesadas poden utilizar para realizar as xestións máis habituais durante a tramitación administrativa (representación, emenda da solicitude, alegacións, renuncia ou recursos, entre outros). Estes modelos son comúns para os distintos procedementos e poderán empregarse sempre que a normativa reguladora do procedemento concreto para o que se vaian utilizar non estableza outros modelos específicos.

Os modelos xenéricos poderán descargarse para anexalos a unha solicitude ou para realizar trámites sobre outros expedientes e presentalos electrónica ou presencialmente segundo a normativa reguladora do procedemento do que se trate.

No formulario deberá indicarse, no seu caso, o procedemento para o que se efectúa o trámite.

Os modelos están dispoñibles en

<https://sede.depo.gal/web/public/dynamic/catalogo/tramitesxenericos>

8.3. Se a solicitude non reunise os datos esixidos na convocatoria ou calquera dos previstos no artigo 66 da LPACAP, requiriráselle á persoa interesada que, de conformidade co establecido no artigo 68 desta lei, nun prazo de dez (10) días hábiles, emende as faltas ou presente os documentos preceptivos, e indicaráselle que, se non o fai, se terá por desistida a súa solicitude, logo da resolución, que deberá ditarse nos termos previstos no artigo 21 da LPACAP.

Novena. Xurado

9.1. A selección do deseño gañador do premio obxecto desta convocatoria realizaraa un xurado nomeado polo presidente da Deputación ou pola deputada ou deputado en quen delegue. O recoñecemento da obriga e a orde de pago do premio será aprobada pola Presidencia da Deputación.

9.2. O xurado estará integrado polos seguintes membros:

- Presidenta: a xefa do Servizo de Comunicación Institucional ou persoa en quen delegue.
- Secretaria: a xefa do Servizo de Xuventude e Reto Demográfico ou persoa en quen delegue.
- Vogal: unha técnica de deseño e imaxe do Servizo de Comunicación Institucional.

O xurado axustará a súa actuación ao disposto para os órganos colexiados na Lei 40/2015, de 1 de outubro, de réxime xurídico do sector público (LRXSP).

As decisións do xurado serán inapelables.

Décima. Publicación de actos

A resolución derivada da proposta do xurado publicarase na páxina web da Deputación de Pontevedra (www.depo.gal), no BOPPO e na BDNS.

Décimo primeira. Deseño premiado

11.1. Ao presentar o cartel ao concurso, a persoa premiada acepta a cesión dos dereitos de explotación do deseño premiado á Deputación de Pontevedra, que poderá levar a cabo as accións que considere oportunas encamiñadas á súa difusión, e que fará constar en todo caso a súa autoría, sen máis limitacións que as derivadas do Real decreto legislativo 1/1996, de 12 de abril, polo que se aproba o Texto refundido da Lei de propiedade intelectual.

11.2. O Servizo de Comunicación Institucional poderá contactar coa persoa gañadora co obxectivo de ter o deseño premiado nun formato que permita a súa edición, para así incluír o logo institucional, o título e lema do encontro e para poder adaptalo aos distintos formatos que se empreguen para a difusión do encontro literario.

11.3. Tras a publicación da resolución derivada da decisión do xurado, procederase á tramitación do recoñecemento da obriga e orde de pago do premio. Así mesmo, de acordo co establecido no artigo 101 da Lei 35/2006, de 28 de novembro, do imposto da renda das persoas físicas, a retención que se lle practicará á persoa premiada será do 15 % do seu importe.

Décimo segunda. Incumplimento das bases

A falsidade nos datos achegados polas persoas participantes no certame dará lugar á exclusión inmediata dos deseños presentados. Se se puxese de manifesto tras a resolución do concurso e o deseño afectado resultase premiado, este quedará sen efecto e deberase reintegrar o premio concedido, ademais de devindicar os xuros legais que correspondan desde a percepción deste ata o seu total reintegro.

Décimo terceira. Interpretación das bases

Todas as dúbidas que puidesen derivar da interpretación destas bases resolveraaas o Servizo de Xuventude e Reto Demográfico.

En todo o que non estea previsto nelas, o xurado queda facultado para resolver as cuestións que se presenten e adoptar os acordos que se estimen necesarios para o efecto.

Décimo cuarta. Autorización para a difusión de imaxes

As persoas solicitantes deberán marcar no cadro habilitado no formulario de solicitude se autorizan ou denegan expresamente a toma de imaxes que se poida realizar no encontro literario, que a Deputación de Pontevedra poderá empregar para noticias contidas en publicacións ou xornais e para a divulgación, tanto nos seus portais web coma nas súas redes sociais, co fin de lograr a difusión efectiva deste.

Décimo quinta. Protección de datos

Os datos persoais obtidos neste procedemento serán obxecto de tratamento pola Deputación de Pontevedra, en calidade de órgano responsable, coa finalidade de xestionar este procedemento, verificar os datos e os documentos que a persoa interesada declare na súa solicitude para comprobar a súa exactitude e levar a cabo todas as actuacións administrativas que, no seu caso, deriven.

A lexitimación para o tratamento baséase no cumprimento dunha tarefa de interese público ou no exercicio de poderes públicos segundo as normas de rango legal recollidas no apartado “normativa aplicable”, dispoñible na ficha de procedemento en <https://sede.depo.gal>, e o consentimento explícito das persoas interesadas.

Os datos persoais obtidos neste procedemento serán obxecto de comunicación ás administracións públicas no exercicio das súas propias competencias ou cando sexa necesario para que a cidadanía poida acceder de forma integral á información relativa a unha materia e ao público xeral dada a publicación de actos prevista.

As persoas interesadas poderán acceder, rectificar e suprimir os seus datos, exercer outros dereitos ou revogar o consentimento segundo o previsto en <https://depo.gal/proteccion-de-datos/exercicio-de-dereitos>.

Décimo sexta. Réxime xurídico

Esta convocatoria rexerase por estas bases reguladoras e, suplementariamente, pola demais lexislación aplicable:

- Lei 38/2003, de 17 de novembro, xeral de subvencións.
- Lei 9/2007, de 13 de xuño, de subvencións de Galicia.
- Ordenanza xeral de subvencións da Deputación de Pontevedra, aprobada polo Pleno na súa sesión ordinaria do 28 de outubro de 2016 e publicada no BOPPO núm. 249, de 30 de decembro de 2016.
- Lei 7/1985, de 2 de abril, reguladora das bases do réxime local.
- Lei 5/1997, de 22 de xullo, de Administración local de Galicia.
- Real decreto lexislativo 2/2004, de 5 de marzo, polo que se aproba o Texto refundido da Lei reguladora das facendas locais.
- Lei 39/2015, de 1 de outubro, do procedemento administrativo común das administracións públicas.
- Lei 40/2015, de 1 de outubro, de réxime xurídico do sector público.
- Real decreto 203/2021, de 30 de marzo, polo que se aproba o regulamento de actuación e funcionamento do sector público por medios electrónicos.
- Lei orgánica 3/2018, de 5 de decembro, de protección de datos persoais e garantía dos dereitos dixitais.
- Bases de execución do Orzamento provincial.

- Orzamento provincial.
- Demais normas de dereito administrativo e, na súa falta, normas de dereito privado.

Décimo sétima. Recursos

Contra o acordo de aprobación destas bases, que lle pon fin á vía administrativa, poderase interpoñer un recurso potestativo de reposición ante o mesmo órgano que o ditase, no prazo dun (1) mes a partir do día seguinte ao da súa publicación (artigos 112, 123 e 124 da LPACAP), ou ben, directamente, un recurso contencioso-administrativo ante o Xulgado do Contencioso-Administrativo de Pontevedra, no prazo de dous (2) meses, segundo o establecido no artigo 46 da Lei 29/1998, de 13 de xullo, reguladora da xurisdición contencioso-administrativa. Todo isto sen prexuízo de que as persoas interesadas poidan interpoñer calquera outro recurso que estimen pertinente.